

遂寧新志 卷五

遂寧縣志卷五

學行

宋

于至 蜀中著作記于至小溪人大中祥符五年進士七歲能

屬文十七遊京師上書二十餘萬言是時文章襲五代餘風

至自立機軸嘗作蓬萊宮賦寇萊公丁晉公皆重之有詩文

行世

明

王輔 穎敏日記萬言以儒仕屢舉不第遂退而教於鄉成就

後學能於從遊諸生識席文襄爲致遠之器

余瑋 字樸夫號方山本實子少以古人自期許與楊名遊得
陽明良知之傳所著有五經實解四書實解方山稿墓在法
寶寺

李銅 本詩禮世家賦性剛介行檢清修談說道理人人竦聽
表正鄉里爲士大夫所重

楊萬全 涉獵書史不干名利以信義孚於宗族鄉里蓋樸茂而
有德者

祖憲 橫崗之後讀書秉禮不徇流俗尤嚴教子諸子皆貴顯

而益恂恂謙默長厚之德至今稱之

謝秉德 性好讀書重厚質直不事華靡以陳太邱自期

高尚志 庠生甘貧苦學不廢寒暑博究羣籍六書字義無不精

曉曾撰邑志稿

徐忠 庠生治禮記性和易人樂與之親棄科舉侍養孝友敦

睦人無閒言

張惠 讀書不事章句行義不計易難始以親老不仕繼以明

季不仕

張教庵傳

韓 葵

先生名惠教庵其號先世楚之麻城人明初遷蜀家遂寧代
有聞人祖贊景泰甲戌進士官禮部尙書郎父尙威以學行
聞於鄉鄉人方之太邱云先生生穎異氣量過人少讀書不
事章句務直挾其所以然嘗讀史至古人出處忠孝大節輒
捲卷歎息不自禁顧念親老矣孰易吾志者由是不樂仕進
居家愉色婉容事父母惟謹旦夕起居問其欲輒先其意志
得請卽進進必時食必潔以爲常遇疾憂不自勝湯藥必先
嘗之及歿哭泣盡哀喪葬皆以禮人稱其孝子五人教之皆
有方治家條理可觀上下肅如也性尤好義救人急鄉黨有

貧乏或急難皆曰歸教庵教庵應之無毫髮吝亦不以疏數分勤惰也每歲則捐金以濟窮者爲具湯茗藥物護視之不幸死輒棺而完其喪歲寒人或病涉卽爲梁以利往來其好施蓋天性數十年無間云初先生旣終喪顧明季浸衰遂不仕居常習靜褐衣蔬食間與故人遊彈琴垂釣意若泊然者然嘗語其子應禮天下將亂人臣當習勞苦任艱難爲國家辨賊耳行矣勿爲念我老人也其子拜命謁兵部得僉書都司次遂寧會獻賊圍城將陷卒與同邑呂公招募民兵力捍賊賊愕怖引去一城賴以完人以是益德先生先生年九十

七疆飯如壯時一日忽召子孫與訣正衣冠端坐而逝聞者
咸悲哭失聲曰公常脫我於難或曰公常室我又曰往歲大
稔公活我我父之死也微公無以歛則益相顧極哀不忍去
學者私謚爲三多先生刻石紀之先生五子孫且百人皆好
學能世其家始先生次子受先生命以僉書捍賊完遂寧城
者後進援沔陽師潰竟抗節以死成先生之志翰林庶吉士
名鵬翮者能文章有志行將大用於時僉書之孫也史氏曰
余嘗讀史記至漢萬石君家不言而躬行子四人皆以孝謹
馴行聞余嘗慕其風若先生之事親孝而卒教子以忠顧不

偉哉翰林君今用文學顯將益起其家未艾也方之萬石又過之矣祀賢祠

清

張烺 字仲震行高品潔世稱完人所著有松齡老人筆記

張仲震傳

陳詵

仲震先生名烺其先世楚之麻城人明初遷邑代有聞人公生而端重不妄言笑事親孝愛尤摯祖教庵公極器愛之嘗謂人曰此子福澤未可量也當明季流寇充斥公父和齋公以守禦進勦功授都司僉書提兵援沔陽師潰抗節死公聞

之晝夜號慟間關至汚扶柩歸葬苦塊墓所致白鳥之祥遂
城水陸要衝自獻賊肆焰諸賊望風效尤公先奉母入山中
避後賊抵遂邑人被禍最慘公合家獨免人皆服公之先見
云母卒公深痛遭時喪亂未能一日盡養而滿目荆榛田廬
蕩棄自此歷十餘年流離播遷歲無寧宇常出萬死一生中
得保身全家亦自詫爲天幸蓋直至長公冢宰庚戌成進士
讀中祕書始稍稍自慰然艱難險阻豈一日忘哉捷書至卽
貽書冢宰曰少年科第昔人以爲不幸謂其志驕學淺以此
自足則所損多也且祖宗積德而發於汝當思何以上不負

君下不負民使立身行己其始不謹後將決裂讀聖賢書所
學何事汝當珍重自愛公留心經濟地方利弊時切於心嚮
者蜀土恢復中丞杭公來問綏靖之方公曰綏靖之要首在
安人心不加田糧則民心安矣補行鄉試則士心安矣杭公
遵而行之蜀士以寧中江驛站遂蓬等縣苦於協濟中丞嚙
公就問調濟之術公曰其在復故道乎前時驛路由劍閣至
成都路近而經費省傳命速而行李便今一轉移而數善備
矣嚙公慨然從之民困頓起冢宰之撫浙也遠近翕然有潔
己愛民之頌公聞之喜輕舟之越諦聽民謠與所聞相符欣

然曰居官當如是矣仍輕舟而還凡僚屬餽遺絲粟不受冢
宰視學三吳公郵寄手諭惟以忠君愛士提拔真才爲諄諄
及冢宰遣祀西嶽江瀆禮成得便道省覲時晉中大饑須還
朝奏請賑濟冢宰流連膠下公亟趨之行曰父子聚首一家
之歡晉中億萬生靈嗷嗷待哺爾爲言官之長理當奏聞不
可緩也冢宰受命遄行得請賑濟全活無算其不以私廢公
恩妨義者大率類此公爲人持已謙和待人寬恕遇人疾苦
患難輒隱於心必盡力爲之拯救性甘淡泊不事侈靡雖躋
榮顯而粗衣糲食廬舍湫隘無異貧士其樂善好施出於天

性大者如捐修遂寧學宮重建成都萬里橋代還遂邑三年
之賦遠贖族中被擄之人以至婚嫁孤寒賑給貧病其爲折
券贈舟者殆不可勝計也尤好手書聖賢格言忠孝故事居
常爲人講解宛轉開導多有聞之而回心嚮道者故蜀之士
大夫言有德者必首曰張公冢宰念公春秋高數陳情歸省
天子曰爾父年雖高然精神尙健毋爲亟請也兩次親灑宸
翰書鮐背神清養志松齡匾額以加寵錫公激切感戴歲癸
巳年八十有七矣自蜀赴京叩祝萬壽奏聞天顏大喜立賜
召見命大臣扶掖上殿慰勞顧問呼爲真正善人踰日賜老

人親賜御酒及冠服寶硯冢宰亦以年齒合例父子同享養
宴老尊賢之宴遭逢盛事實曠古所希覲焉旣歸常靜坐一室
其視聽愈聰明步履益強健臨終賦詩三章端坐而逝年八
十有八禮部奏聞蒙恩賜恤遣官讀文致祭嗚呼公眞可謂
宇宙內之完人矣論曰歐陽子云爲善無不報而遲速有時
公抱忠孝之心與濟人利物之志乃生逢憂患未能稍施萬
一迨至冢宰策名著績喉舌帝廷而公始幸償其夙願也豈
不難哉然而褒封及於四代休問達於九重福澤壽考爲斯
世所莫竝抑又盛矣蓋公之先積德累行非一世矣貽謀悠

遠其昌熾曷可量哉

張問安 字亥白一字季門文端公元孫顧鑑長子乾隆戊申舉

人天性孝友澹於榮利例授教職不就家居奉母以圖史自
娛凝塵滿席泊如也詩才超逸隨涪陵周東屏侍郎視學嶺
南遍覽名山勝水格律益進與弟問陶有二難之目主講華
陽溫江書院誘掖後進多所成就卒於家著有小鄉媛詩集

張亥白先生傳

李星根

亥白先生者蜀詩人船山太史之兄也先生姓張氏名問安
字亥白遂寧人遂寧相國以經濟顯名於仁皇帝之朝迄先

生五世矣而獨昌其詩兄弟競爽旗鼓相當雖天才雄放文采風流照映四國若稍稍遜乃第一籌至於撫山範水刻畫杜陵唐突康樂真力彌滿萬象在旁殆有過之無不及焉先生兄弟生長東南旣舉京兆卒不得志宜其倦於遊矣故自粵遊以後收拾山水入奚囊中歸而奉母博勝下之歡雖授館時有鄰縣之役而終非其志也惟一室琴書母妻靜對人生之樂覺無以踰而殊不偶屢斷朱絃雖歷聘名媛有同聲之樂究之彩雲易散曇花愛空荀粲傷神微之悲遣又數數焉以視船山閨詠幾於頻見不鮮矣至如宛若中論四聲又

姒婦爲巨擘倘亦亥白之所爲回首而慰藉者乎李星根曰
亥白船山集旣行海內矣故於志存千百什一焉至呂文肅
父子其傳浸微故採得者卽錄之無遺他登載者悉依二先
生例而不與者亦非漫無斟酌也屬作亥白傳而偶論及之
云

過清崖泊梓潼宮將遊大佛寺尋石磴琴聲諸勝會雨
阻不果

長安微雨過杳靄明雲林黃帽刺船去青山相映深將尋列
仙跡似撫成連琴吟眺但終日烟波愁暮心